

ԽՈՐ ՎԻՐԱՊ ՎԱՆՔԻ ԵՐԻՏԱՍԱՐԴԱՑ ՄԻՈՒԹՅԱՆ ԱՅՑԸ ՎԵՀԱՐԱՆ

Արդեն ինն ամիս է, ինչ գործում է Խոր Վիրապ վանքի Հայ Եկեղեցա-սեր Երիտասարդաց Միությունը: Այն պետական հաստատում է ստացել 4 հոկտեմբեր 1990 թ.: Միության մաս են կազմում շուրջ 50 երիտասարդ ու-սուցիչ-ուսուցչուհիներ, որոնք իրենց առջև նպատակ են դրել ավելի մոտի-կից ծանոթանալ Հայ Եկեղեցուն, որպեսզի հետագայում իրենք ևս հնարա-վորություն ունենան կրոնի դասեր ավանդելու հայկական միջնակարգ դըպ-րոցներում: Միությունը հետապնդում է մի շարք մշակութային և բարեգոր-ծական նպատակներ, ինչ որ ողջունելի է և խրախուսելի: Միությունը հրա-տարակում է նաև «Գավիթ» թերթը:

Նոյեմբերի 17-ին, շաբաթ օրը, Խոր Վիրապ վանքի Հայ Երիտասար-դաց Միությունը Տ. Մխիթար քահանայի առաջնորդությամբ այցելեց Մայր Աթոռ Ս. Էջմիածին և ստացավ Ամենայն Հայոց Կաթողիկոս Վազգեն Ա-ի օրհնությունը: Որդիական երախտիքի խոսքով հանդես եկավ Միության ա-տենապետ, Խոր Վիրապ վանքի ծխականտար քահանա Տ. Մխիթար քին. Սարիբեկյանը և պատմեց իրենց Միության գործունեության ու ապագայի ծրագրերի մասին: Հանդես եկան նաև Միության ուրիշ անդամներ:

Վեհափառ Հայրապետը օրհնեց և քաջալերեց նրանց, արտահայտելով իր հայրապետական գնահատանքն ու հայրական գոհունակությունը:

ՀԱՂՊԱՏԱՎԱՆՔ

1990 թ. ապրիլի 15-ին վերաբացվեց Հաղպատի վանքը: Վեհափառ Հայ-րապետի կարգադրությամբ վանքի վանահայր է նշանակվել Տ. Եզնիկ քին. Պետրոսյանը: Նկատի ունենալով այն հանգամանքը, որ Հաղպատավանքը իր հիմնադրության օրվանից (991 թ.) եղել է Լոռվա շրջանի հոգևոր կենտ-րոնը և որ վերջին տասնամյակների ընթացքում Թումանյանի շրջանում ոչ մի գործող եկեղեցի չի եղել, Հաղպատավանքի վանահայրության վրա պար-տականություն էր դրված հոգ տանել ոչ միայն Հաղպատավանքի, այլ նաև ողջ շրջանի եկեղեցական, կրոնական և հոգևոր դաստիարակչության կա-րիքներին: Այդ հոգևոր ծրագիրը արդեն իսկ գործադրության է տրված վա-նահոր ջանքերով:

Ա.— Վանահայրության առաջին գործը եղավ բացել դպրանոց, ուր այժմ ուսանում են 18 սաներ: Ուրախությամբ կարող ենք հայտնել, որ համապա-տասխան քննություններ անցկացնելուց հետո Գուգարաց թեմի առաջնորդ Տ. Արսեն եպիսկոպոս Բերբերյանը նոյեմբերի 4-ին դպրության չորս աստի-ճաններ շնորհեց բոլոր սաներին, ինչպես նաև վեց սաների շնորհեց ուրար կրելու իրավունք և սարկավագ ձեռնադրեց Գրիգոր Մնացականյանին:

Բ.— Ընդառաջելով Հաղպատավանքի վանահայրության դիմումին Թու-մանյանի շրջանային և Ալավերդի քաղաքի քաղաքային խորհուրդները որո-շում ընդունեցին և Հաղպատավանքի վանահայրությանը հանձնեցին շրջա-նի բոլոր գյուղական եկեղեցիները, այդ թվում Օձունի Խաչգունդ, Աքորիի

Ս. Գևորգ, Դսեղի Ս. Գրիգոր Լուսավորիչ, Շնողի Ս. Սարգիս, Մղարթի, Արդվիի, Հագվիի, Լորուտի, Մարցի, Թեղուտի, Ծոնկանի և այլ եկեղեցիները, ինչպես նաև Սանահին վանքի Ս. Աստվածածին եկեղեցին: Այս եկեղեցիներից Օձունի, Սանահինի, Աբորիի, Դսեղի և Շնողի եկեղեցիներում արդեն իսկ կատարվում են կրոնական արարողություններ: Յուրաքանչյուր եկեղեցուն կից ստեղծվել է հինգամսյա համայնքային խորհուրդ, որոնք ըսկսել են հանգանակություն՝ մասնակից լինելու համար իրենց եկեղեցիների վերանորոգման ծախսերին:

Գ.— Նկատի ունենալով կրոնական դաստիարակության կարևորությունը, Հաղպատավանքի վանահայրությունը կազմել է կրոնի դասերի մի հատուկ ծրագիր հանրակրթական դպրոցների վերջին երեք դասարանների համար, գործադրվում է Ալավերդի քաղաքի երեք միջնակարգ, երկու երաժշտական, Օձունի և Աբորիի դպրոցներում: Դասավանդությունները կատարում են Հաղպատավանքի դպրանոցի ավագ սաները, վանահոր գլխավորությամբ և անմիջական հսկողությամբ:

ՆՈՐ ԱՌԱՋՆՈՐԴԻ ՆՇԱՆԱԿՈՒՄ ՇԻՐԱԿԻ ՀԱՅՈՑ ԹԵՄՈՒՄ

Ամենայն Հայոց Կաթողիկոս Ս. Ս. Վազգեն Ա Վեհափառ Հայրապետի կարգադրությամբ սույն թվականի նոյեմբերին Շիրակի թեմի առաջնորդ է նշանակվում Արգենտինայի հայոց թեմի նախկին առաջնորդ Մայր Աթոռի միաբան Ս. Գրիգորիս եպս. Բունիաթյանը, որ իննամյա իր ծառայությունից հետո վերադարձել է հայրենիք: Թեմի նախկին առաջնորդը՝ Ս. Նարեկ եպս. Ծաքարյանը, մոտ 20 տարվա ծառայությունից հետո, հրավիրվել է Մայր Աթոռ Նոր պատասխանատու պաշտոն ստանձնելու համար:

Նոր առաջնորդի աթոռակալության արարողությունը տեղի ունեցավ նոյեմբերի 25-ին, կիրակի օրը, Կումայրիի Ա. Յոթ Վերք եկեղեցում: Ս. պատարագի ընթացքում կարդացվեց Վեհափառ Հայրապետի՝ սրբատառ կոնդակը նոր առաջնորդի նշանակման մասին: Հրաժեշտի և օրհնության խոսքերով հավատացյալներին դիմեցին Ս. Նարեկ և Ս. Գրիգորիս սրբազանները:

Հավարտ ս. պատարագի Ա. Յոթ Վերք եկեղեցու ավանդատան մեջ Ս. Գրիգորիս եպիսկոպոսը ընդունեց Կումայրիի հավատացյալ ժողովրդի, ինչպես նաև տեղի իշխանության ներկայացուցիչների և մտավորականների շրնորհավորանքները:

ԹԱԼԻՆԻ Ս. ԱՍՏՎԱԾԱԾԻՆ ԵԿԵՂԵՑՈՒ ՕԾՈՒՄԸ

Սույն թվականի դեկտեմբերի 8-ին մեծ հանդիսավորությամբ և բազմահազար ժողովրդի ներկայությամբ կատարվեց Թալինի Ս. Աստվածածին եկեղեցու օծումը, ձեռամբ Շիրակի թեմի նորընտիր առաջնորդ Ս. Գրիգորիս եպս. Բունիաթյանի և մասնակցությամբ Ս. Նարեկ եպս. Ծաքարյանի ու Ս. Անանիա եպս. Արաբաջյանի: Օծումից հետո առաջնորդ սրբազան հայրը մատուցեց ս. պատարագ: Հավուր պատշանի քարոզով հանդես եկան երեք եպիսկոպոսները: